

- लोकसभा मांय वक्फ संशोधन बिल 2025 माथे चर्चा व्हे रही है-अल्पसंख्यक कार्यमंत्री किरेन रिजिजू कह्यो-सरकार वक्फ बोर्ड ने समावेशी अर धर्मनिरपेक्ष बणावण री मंशा राखे है।
- वनमंत्री संजय शर्मा कह्यो-मध्यप्रदेश अर उत्तराखंड ऊं प्रदेश मांय बाधिनां लावण री तैयारी।
- राजस्थान कर्मचारी चयन बोर्ड 28 सरकारी महकमां मांय 13 हजार ऊं बत्ता ओहदां माथे भर्तियां सारू अर्जियां मांगी।
- चिकित्सा मंत्री गजेन्द्र सिंह खींवसर मौसमी बीमारियां री शंका ने ध्यान राखता थकां अस्पतालां मांय सगळा ज़रूरी सुबीता तैय करण रा हुकम दीना।

000

लोकसभा मांय वक्फ संशोधन बिल, 2025 माथे चर्चा चाल रही है। केंद्रीय अल्पसंख्यक मामलात् मंत्री किरेन रिजिजू ओ बिल पेश करता थकां कह्यो के ई बिल रो मुस्लिम समुदाय री धार्मिक रीतियां ऊं कोई लेणो-देणो नी है अर केवल वक्फ बोर्ड ऊं जुड़ी सम्पत्तियां रा बारा मांय है। श्री रिजिजू कह्यो के वक्फ बोर्ड रो प्रबंधन राज्य सरकारां करेला।

श्री रिजिजू कह्यो के सरकार वक्फ बोर्ड ने समावेशी अर धर्मनिरपेक्ष बणावण री मंशा राखे है। वे कह्यो के ओ बिल मस्जिदां रा प्रबंधन सारू नी है। अल्पसंख्यक मामलात् मंत्री कह्यो के संशोधन बिल मांय वक्फ बोर्ड मांय न्यारा-न्यारा मुस्लिम संप्रदायां, महिलावां, गैर-मुस्लिम अर दूजा लोगो री नुमाइंदगी व्हेला। श्री रिजिजू कह्यो के इण ने उम्मीद नाम दियो ज्यो है।

श्री रिजिजू विपख माथे बिल रा बारा मांय जनता ने गुमराह करण रो आरोप मांड्यो। चर्चा री सरुआत करता थकां कांग्रेस रा गौरव गोगोई सरकार माथे ओ बिल ला र जनता ने गुमराह करण रो आरोप मांडता थकां कह्यो के ओ बिल संविधान रे खिलाफ है। श्री गोगोई कह्यो के मौजूदा कानून मांय बदलाव ऊं और परेशानियां पैदा व्हेला।

इण ऊं पैली केंद्रीय गृह मंत्री अमित शाह कह्यो के ओ बिल संयुक्त संसदीय समिति कानी ऊं विगतवार चर्चा पाछे लायी ज्यो है अर मंत्रिमंडल इण ने मंजूरी दे दीनी है।

000

आवता बगत मांय देश रा सगळा रेलवे टेशनां माथे ज़रूरी तादाद मांय सीसीटीवी कैमरा लगाया जावेला। रेल मंत्री अश्विनी वैष्णव आज लोकसभा मांय आ जाणकारी दीनी। वे कह्यो के देश रा न्यारा-न्यारा हलकां मांय टेशनां माथे सीसीटीवी कैमरा लगाया जा रह्या है अर करीब डोढ़ साल मांय ओ काम पूरो कर लियो जावेला। महिलावां री हिफाजत रा मुद्दा माथे श्री वैष्णव कह्यो के ई सारू रेलवे केई जतन कीना है। रेल मंत्री बतायो के हर डिवीजन, जोन अर रेलवे बोर्ड मांय वॉर रुम बणायी ज्यो है, ज्यां रे ज़रिए टेशनां माथे लगातार निगराणी राख्यी जा रही है।

000

वन मंत्री संजय शर्मा कह्यो है के राज्य मांय मध्यप्रदेश अर उत्तराखंड ऊं बेगा ई टाइगर लाया जावेला। वे आज कोटा मांय खबरनवीसां सागे बातचीत कर रह्या हा।

जलदाय मंत्री कन्हैयालाल चौधरी आज डूंगरपुर मांय जल जीवन मिशन रा तैत कर्या जा रह्या कामां रो जायजो लेवण सारू अहलकारां सागे मीटिंग कीनी अर वां ने ज़रूरी हुकम दीना।

पशुपालन मंत्री जोराराम कुमावत ई पाली ज़िला रा सुमेरपुर मांय जणसुनवाई कीनी अर अहलकारां ने समस्यावां रा बेगा निपटारा सारू ज़रूरी हुकम दीना। श्री कुमावत सांडेराव मांय ढांढां रा अस्पताल रो ई दौरा कीनो।

000

दिल्ली रा मनोहर परिकर रक्षा अध्ययन अर विश्लेषण संस्थान रा महानिदेशक सुजान आर. चिनॉय आज पाकिस्तान ऊं लाग्योड़ा सरहदी हलकां रो दौरा कीनो। वे जैसलमेर मांय सीमा सुरक्षा बल-बी. एस.एफ. रा जवानां अर महिला पहरेदारां सागे मुलाकात कीनी। महानिदेशक बीएसएफ रा अहलकारां सागे अन्तर्राष्ट्रीय सरहद माथे हिफाजती इन्तज़ामात रा बारा मांय चर्चा कीनी। वे बीएसएफ रा

असलाह री प्रदर्शनी ई देखी। महानिदेशक चिन्तय तनोट माता रा मन्दिर मांय पूजा-अर्चना कर र देश मांय सुख-शांति री कामना कीनी।

000

राज्य मांय 28 सरकारी महकमां मांय 13 हजार ऊं बत्ता ओहदां माथे संविदा रा आधार ऊं भर्तियां करी जावेला। ई सारु पात्र उम्मीदवार राजस्थान कर्मचारी चयन बोर्ड री वेबसाइट माथे एक मई ताई ऑनलाइन तरीका ऊं अर्जी दे सके है। न्यारा-न्यारा ओहदां माथे भर्ती सारु बारहवीं कक्षा ऊं स्नातक ताई भण्या-पढ्या उम्मीदवार अर्जी दे सके है। ई पाछे कंप्यूटर आधारित परीक्षा ऊं उम्मीदवार चुण्या जावेला। ई सारु दो जून ऊं बारह जून ताई भर्ती परीक्षा व्हेला।

000

राजस्थान पुलिस प्रदेश मांय गम्योडा बच्चां री तलाश सारु ऑपरेशन खुशी अभियान चलायो है। एक महीना रा ई अभियान रा तैत गुमशुदा बच्चां री ठा कर र वां ने वां रा पिरवार वाळां ने सूंप्या जावेला। अतिरिक्त पुलिस महानिदेशक मालिनी अग्रवाल बतायो के ई सारु थानावार टीमां बणायी ज्यी है अर ज़िलां री साइबर सेल री ई मदद ली जा रही है।

000

राज्य मांय काल ऊं एक और पश्चिमी विक्षोभ रा असर ऊं जयपुर, कोटा अर भरतपुर संभाग मांय बादळा मंड्या रेहवण अर कठे-कठे तेज बायरा सागे हल्की बारिश रा आसार है। ई बीचे घणखर ठोड़ां गर्मी रो असर बध रह्यो है। लारला चौबीस घंटा मांय बाड़मेर मांय पारो 40 डिग्री सेल्सियस ने पार कर ग्यो। जालौर, जोधपुर, जैसलमेर अर चित्तौडगढ़ मांय ई दिन री बगत तापमान 38 डिग्री सेल्सियस ऊं ऊंचो रह्यो। पांच अप्रैल ऊं बाड़मेर अर जैसलमेर समेत कठे-कठे लू बाजण रा आसार है। ई बीचे उनाळा री सरूआत सागे ई चिकित्सा विभाग सावचेत व्हे ग्यो है। मौसमी बीमारियां रा मरीजां मांय बधोतरी री शंका ने ध्यान राखता थकां अस्पतालां मांय व्यवस्थावां चाक-चौबंद करी जा रही है। चिकित्सा मंत्री गजेन्द्र सिंह खींवसर वीडियो कॉन्फ्रेंस रे मार्फत चिकित्सा अर चिकित्सा शिक्षा ऊं जुड्या आला अहलकारां सागे मीटिंग कीनी। वे मौसमी बीमारियां रा मरीजां री बधती तादाद ने ध्यान राखता थकां अस्पतालां मांय सगळा ज़रूरी इन्तजामात् तैय करण रा हुकम दीना।

000

चैती नौरता रा तैत आज मां दुर्गा रा पांचवां रुप शेर माथे बैठी स्कन्दमाता री पूजा-बर्चना करी जा रही है। नौरता मांय मां दुर्गा रा न्यारा-न्यारा रुपां री पूजा-अर्चना करी जावे है। मां दुर्गा बुराई माथे अच्छाई री जीत रो प्रतीक है। चैती नौरता खुद री शुद्धि अर आध्यात्मिक उन्नति रो समय मान्यो जावे है।

000

राजस्थान लोक सेवा आयोग-आरपीएससी **आरएएस-2023** मुख्य परीक्षा मांय पास नी व्हे सक्या उम्मीदवारां रा नम्बरां री ओजू गिणती रो मौको दीनो है। ई सारु उम्मीदवार काल ऊं 12 अप्रैल ताई ऑनलाइन तरीका ऊं अर्जी दे सके है। ई सारु ऑफलाइन तरीका ऊं अर्जी नी दी जा सके है। आयोग साफ कीनो है के केवल नम्बरां री ओजू गिणती अर जोड़ करी जावेला, कॉपियां ओजू नी जांची जावेला।

000